

Media Title : Utusan Sarawak
Headline : SRS Kampung Muhibbah teruskan aktiviti rondaan
Date : 27 May 2022
Page : 13

SRS Kampung Muhibbah teruskan aktiviti rondaan

SIMANGGANG: Keadaan cuaca tidak menentu pada masa sekarang tidak akan menghalang pihak Skim Rondaan Sukarela (SRS) Zon 1 Kampung Muhibbah dekat sini meneruskan aktiviti rondaan di penempatan mereka sendiri.

Ketua Perondanya, Ramli Abu Sera berkata meskipun Sarawak berdepan cuaca panas terik dan hujan pihak mereka tetap mengutamakan amanah serta tanggungjawab menjaga keselamatan kampung seperti yang diamanah oleh penduduk sebelum ini.

"Berasaskan berita yang kami baca, peralihan monsun barat daya yang menyebabkan cuaca panas terik semenjak empat hari lepas sehingga per-

tengahan September ini masih boleh mencetuskan hujan lebat, angin kencang dan petir.

"Pihak kami sudah pun sedia maklum mengenai perkara ini dengan SRS dari lain-lain kawasan di Sri Aman turut diseru agar kekal meneruskan rondaan demi menjaga keselamatan harta benda penduduk sepanjang masa," katanya.

Selain itu aktiviti rondaan secara konsisten yang dilaksanakan oleh SRS kata Ramli juga akan dapat membantu pihak polis untuk mengurangkan kadar kes jenayah pecah rumah dan kecurian harta benda di Sri Aman.

Malah penduduk kampung katanya juga akan dapat membantu pihak polis mengurangkan

kadar kes jenayah berkenaan jika mereka sentiasa peka terhadap langkah mempertingkatkan tahap keselamatan rumah seperti yang disaran oleh agensi kerajaan itu sebelum ini.

"Justeru kami menyarankan penduduk untuk mengenakan kunci tambahan terhadap rumah masing-masing jika pergi untuk masa yang lama dengan lampu luar sentiasa dipasang bagi memudahkan kerja pemantauan polis dan SRS," katanya.

Terdahulu, Ramli pada malam kelmarin telah pun memimpin seramai tujuh anggotanya untuk melakukan rondaan sekitar kawasan Zon Selatan dan Zon Tengah di Kampung Muhibbah melalui Program Lan Kito Meronda.

Turut menyertai rondaan itu adalah Pegawai Perpaduan Bahagian Sri Aman, Ahmad Noorkamal Abdul Malek, Chek Rasit dari Jiran Wanita Kawasan Rukun Tetangga (KRT) Kampung Muhibbah.

KEKAL KOMITED... Ahmad Noorkamal Abdul Malek, Chek Rasit, Ramli Abu Sera dan Anggota SRS sebelum bermula Program Lan Kito Meronda di Kampung Muhibbah dekat Bandar Simanggang malam kelmarin.

